

Recueil des chartes de l'abbaye de Stavelot-Malmedy, 127

In nomine sancte et individue Trinitatis. Respectu divine miserationis electus tertius Heinricus gratia [Dei] Romanorum imperator augustus et patricius. Quoniam comperimus auctoritate sancte Scripture omnem hominem de bonis exemplum recipere, dignum et justum est, fatemur id magis imperialem celsitudinem sollicitius debere servare. Unde noverit universitas fidelium nostrorum tam presentium quam futurorum, quoniam predecessores nostri reges scilicet Sigibertus, Hildricus, nec non imperatores Karolus, Ludouuicus, tres Ottones seu serenissime memorie Heinricus imperator genitor noster sue auctoritatis firmitate sanctiverunt, ut advocatus locorum Stabulaus sive Malmundarium in curtibus ad ipsa loca respicientibus non presumat mansuras aut paraturas facere, redebitiones aut freda exigere aut placitum tenere aut de placitis quicquam habere aut parefridos accipere. Eadem et nos abbati et ejus successoribus firmando corroboravimus et quicquid sane acquisitum fuerit in quibuslibet rebus ecclesie sub eadem lege roboratur nostre preceptionis auctoritate habens emunitatem ab omni invocatorum infestatione. Et ut hec nostre concessionis ac renovationis atque confirmationis plenior habeatur auctoritas, manu propria hoc preceptum subter firmavimus et sigilli nostri impressione insigniri jussimus.